

Najoqqutassat pituttuisuunnngillat, naalakkersuisoqarfilla tapiissutit ataasiakkaat suliarineqarnerini missingersuinissamut pisussaatitaavoq.

Namminersorlutik Oqartussat timersortarfiit iluarsaannissaannut tapiissutaasa najoqqutassai

Atuuffia nassuiaatillu

§ 1. Najoqqutassat kommuneqarfiit timersortarfiinut, timersortarfiillu suliffeqarfinit imminut pigisunit ingerlanneqartunut, iluarsaassinissamut Namminersorlutik Oqartussat tapiissutaannut atuupput.

§ 2. Timersortarfik imatut paasineqassaaq illu portusuumik qilaalik, timersornernut naleqqussagaq.

§ 3. Timersortarfimmi iluarsartuussineq imatut paasineqassaaq timersortarfimmik tamakkiisumik imaluunniit timersortarfiup ilaanik iluarsartuussineq, aaqqinneqarsimasoq iluarsillugu, nalinginnaasumik taarsiinermi imaluunniit atortunik aserorsimasunik iluarsaassinermi.

Imm. 2. Timersortarfiup atortui tamarmik iluarsartuussinermi ilanngunneqarsinnaapput.

Tapiiffigineqarnissamut piumasaqaatit tapiissutillu atorneqarnerat

§ 4. Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup kommune piumaffigisinnaavaa Najukkanut Sanaartornermullu Aningaasaateqarfimmiit aningaasanik tapiiffigineqarnissamut periarfissat paasiniaqqullugit.

§ 5. Iluarsaassinermi aningaasartuutit 50 %-iinik Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik tapiissinnaavoq .

Imm. 2. Iluarsaassinermi imm. 1 malillugu matussuserneqanngitsut aningaasalersorneqarnissai tapiiffigineqartup qulakkiissavaa.

Imm. 3. Iluarsaassinermut suliniutip aallartereernerani aningaasartuutit takkuttut, suliniutillu missingersuutaani A-mi aningaasaqarnikkut killiliussat avataaniittut, timersortarfiup piginnittuaniit akilerneqassapput.

§ 6. Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik tapiissutisinissamut piumasaqaatinik ilanngussaqaarsinnaavoq.

Tapiissutisinissamut suleriaaseq

§ 7. Timersortarfiit qanoq innerinut nalunaarusiat aammattaaq Namminersornerullutik Oqartussat ukiunut tallimanut pilersaarusiaasa ilaat ukiut tamaasa nutarterneqartartoq tunngavigalugit tapeqartitsisoqartarpoq.

§ 8. Tapiissutininik aningaasaliissutininik pingaarnersiulluni tulleriarineq una pilersaarut naapertorlugu pissaaq:

- 1) Ukiup aningaasanut inatsiseqarfiusup aallartinnerani Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup kommunimi suleqatigissallugit piukkunnartut suleqatigalugit iluarsaassinernut suliniutinut tapiissutit toqqassavai.
- 2) Suleqatiginissamut piukkussat missingersuutaat C missingersuut B-iinngorlugu suliarineqassaaq. Suliarinninnermi aningaasartuutit timersortarfiup piginnittuata aamma Namminersorlutik Oqartussat akornanni assigiimmik agguarneqassapput.
- 3) Suleqatiginissamut piukkussat missingersuutaat B-iit suliarineqareerpata suleqatiginissamut piukkussat iluarsaassinermut suliniutaat sorliit naatsorsuutigisatut tapiissuserlugit suliarineqassanersut Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup nalunaarutigissavaa.
- 4) Suleqatiginissamut piukkussat missingersuutaat A-t suliarineqareerpata Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik ima iliusaaq:
 - a) iluarsaassinermut suliniutinut tapiissutit aningaasaliissutit inaarutaasut nalunaarutigissavaat, tassani missingersuutip A-p aningaasaqarnikkut killiliussami missingersuut B-ip missingersuutaanniipput.
 - b) iluarsaassinermut suliniutinut immikkut nalilersuinerмик aallartitsissapput, tassani missingersuutaasa A-p aningaasaqarnikkut killiliussaata missingersuut B qaangeqqavaa. Immikkut nalilersuinerмик tapiinissaq itigartitsinerlu pillugit timersortarfiup pineqartup piginnittua toqqaannartumik nalunaarfigineqassaaq.

§ 9. Iluarsaassinermut suliniutip aallartinnissaanut tapiissutit siumoortumik tunniunneqassapput toqqaannartumillu tapiiffigineqartumut tunniunneqassallutik.

Aningaasalersuineq naatsorsuutillu

§ 10. Namminersorlutik Oqartussat timersortarfinnut tapiissuteqarnerat Nunap Karsianiit aningaasalersorneqarpoq, Aningaasanut Inatsimmi konto 84.40.14 Kulturimut timersornermullu atugassanik sanaartorneq (Sanaartornermut aningaasaliissutit).

§ 11. Tapiiffigineqartoq iluarsaassinermut suliniummut naatsorsuusiusaaq taamaalillunilu tapiissutit siunertamut aningaasaliiffigineqartumut atorneqarsimaneri pillugit uppersaassalluni. Suliniutip naanerata kingorna qaammatit marluk qaangiutsinnagit naatsorsuutit Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmu apuunneqareersimassapput.

Imm. 2 Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfiup tapiiffigineqartoq qaqugukkulluunniit qinnuigisinnaavaa iluarsaassinermut suliniummut tapiiffigineqartumut paasissutissartaanik nassiusseqqullugu, tassunga ilanngullugu iluarsaassinerup killiffigisaa.

§ 12. Tapiissutit tamakkiisumik ilaannakuusumilluunniit utertinneqarnissaat piumasarineqarsinnaavoq, tapiissutinik pissarsisoq:

- 1) eqqunngitsunik paasissutissiisimappat,
- 2) tapiiffigineqarnissamut piumasaqaataasut naammassinngippagit, tassunga ilanngullugit tapiiffigineqarnissamut piumasaqaataasinnaasut naammassinngippagit,

- 3) piffissaq eqqornagu naammaginartunik naatsorsuutunik nassiussippat,
- 4) iluarsaassinermut suliniummut isumaqatigiissutigineqartumut tapiissutit atunngippagit, imaluunniit
- 5) paasissutissat naapertuuttut, naatsorsuutit ilanngullugit nassiukkumangippagit.

§ 13. Najoqutassiat 1. marts 2017-imi atuutilerput, 2016-imilu kingusinnerusukkulluunniit iluarsaassinermi suliniutit aallartissimasunut atuullutik.